

Ministro Tico Croes "Parlamento mester duna mandato nobo pa ehecuto projecto di Radisson"

ORANJESTAD(AAN)

Despues di e reunion di parlamento den cua e partidonan MEP y OLA a sostene e mocion pa para e projecto di benta y renobacion di Radisson hotel y despues di e rueda di prensa di Minister Tico Croes ayera tardi, e dos partidonan MEP y OLA a bai splica nan posicion den publicidad.

Tur dos partido pa medio di nan lidernan a duna di conoce despues di a tende di e minister kiko ta e consecuencianan di nan mocion, cu nan no tabata kier men cu mester para e projecto.

Tur dos partido MEP y OLA

a bisa cu aunke e impresion ey a worde crea, nan no kier esey.

Nan kier pa e projecto sigui, pero kier haci investigacion tambe.

Minister Tico Croes, a duna e siguiente declaracion despues di e tuma nota di e reaccion di e dos partidonan MEP y OLA. "Mi a tuma nota di e declaracion via medionan di prensa cu nan no kier para e projecto, pero si nan kier un investigacion. Mi ta masha contento cu esey, pero pa motibo di e mocion cu nan a acepta y pa motibo di e respect cu mi tin pa e organo mas halto di nos pais, mi mester haña un mandato nobo di parlamento pa sigui cu e projecto. Ami no tin nada contra di un investigacion, pasobra tur asunto, tur projecto y tur desicion di gobierno ta worde investiga normalmente door di Controlaria General (Algemene rekenkamer) y accountantdienst. Parlamento sa esey. Si apesar di esey y apesar di e informacion extenso cu mi a duna, tog nan ta expresa den un mocion cu nan kier un investigacion a corto plazo, ta pasobra nan tin duda den e projecto.

Ami no ta ehecuto ningun plan cu tin duda riba dje of cu por ta contra cualkier regla di nos pais pasobra actualmente e mocion pa laga investiga e projecto y mirando cu no tabata tin un mayoria grandi den parlamento riba ehecucion di e projecto, esaki ya caba a pone institucionnan financiero cumenza hala atras riba e projecto.

No ta mi persona como mandatario so mester tin claridad completo, pero sigur institucionnan financiero cu ta bay inverti nan placa den e

projecto.

Pesey ayera despues cu noticia a plama rond en conexion cu mocionnan pasa den parlamento y reaccionnan cu esaki a trece di institucionnan financiero, no ami so pero abogadonan cu ta representa diferente instancia envolvi, a conclui cu mester para e projecto pa haci e investigacion.

No ta asina cu mi persona kier para e projecto pasobra aki tin interesnan asina grandi envolvi pa pais Aruba y su economia, cu e projecto no mag di worde para.

Si MEP y OLA no kier para e projecto, anto nan mester dunami un mandato completo via parlamento pa mi sigui.

CLARIDAD

E comportacion di parlamento den e asunto aki tabata sumamente bruha y dudoso. Tanto den e expresionnan y den e mocion y e votamento pa e mocion, e fraccionnan di OLA y MEP a manda señalnan masha contradictorio y bruha. Cada ken cu a sigui e reunion y a lesa e mocion a saca e mes un conclusion cu minister Tico Croes. Tur hende cu a tende e consecuencianan di e cancelacion di e acuerdo a spanta y a puntra si ta loco e fraccionnan di MEP y OLA a bira.

E reaccion di e lidernan di MEP y OLA despues di a tende e consecuencianan di

nan accion den parlamento, ta na su lugar.

Nan tambe a realisa loke nan a haci y a corriji esaki.

Minister Tico Croes a reacciona riba esaki bisando: "Parlamento no por manda señalnan confuso y contradictorio. E ta bruha enbez di duna claridad. Y ta esey nan a haci cu nan mocion."

Mi ta contento cu nan coreccion despues di a tende e consecuencianan. Mi ta contento cu nan kier pa nos dal bai cu ehecucion di e projecto di benta y renobacion di e hotel. Pero nan mester haci esaki pa medio di e mes un forma cu nan a manda e desaprobacion awe. Nan mester bai parlamento y formalmente duna e minister di conoce cu e projecto por sigui manera e ta." Pa loke ta e nevestigacion cu MEP y OLA ta pidi den nan mocion, e minister a splica cu e no tin nada contra. "Semper mi a tene tur instancia relevante bon informa di tur loke mi a haci. Un investigacion di projectionan ta algo normal. Si nan no kier expresa duda y para e projecto nan mester bisa esey den parlamento. Pasobra ta di parlamento ami ta haña e poder ehecutivo pa traha. Mi ta respecta e autoridad di parlamento y no por actua sin su sosten."

Ministro Glenbert Croes: MINISTRO TICO CROES MESTER PENSA UN TIKI MAS RIBA SU DECISION

ORANJESTAD (AAN): Durante un conferencia di prensa relampago yama door di Ministro Glenbert Croes na Compleho Deportivo Guillermo Trinidad, el a reacciona inmediatamente riba e decision di Ministro Tico Croes pa inmediatamente stop e "deal" cu Radisson, stop e "deal" cu Global Casinos, y principalmente no sigui negocia riba e asunto di financiamiento pa yuda Air Aruba.

Ministro Tico Croes a splica cu Dutchco legalmente ta fiando e aerolinea nacional e placa necesario cu e mester pa asina por opera. Pero debi na e mocion firma door di MEP y OLA den Parlamento, e titular di economia y turismo a dicidi pa mihor e stop cu tur e cos aki, y laga e investigacion di Algemene Rekenkamer y otronan sigui prome.

Den su Conferencia di prensa, Ministro Glenbert Croes ta lamenta cu su colega Ministro Tico Croes a tuma un decision asina pisa djis algun momento despues cu e reunion di Parlamento a termina.

E lider di OLA ta kere cu Ministro Tico Croes a tuma un decision demasiado rapido, y pesey e ta pidi su colega pa por fabor recapita, pense un tiki mas, y no tuma un decision asina drastico.

Ministro Glenbert Croes a indica cu loke e mocion di MEP y OLA ta encera, ta pa

un investigacion worde haci, y NO pa e deal worde cancela. Nan kier pa e deal sigui, y pa Ministro Tico Croes no tuma decision asina drastico, cu ta bay afecta entrada di centenares di trahador di Radisson, y tambe haci futuro di e aerolinea un tiki insigni.

CRECHE, LA POSTEMA!!

